

МОНГОЛ УЛСЫН ХУУЛЬ

2025 оны ... дугаар
сарын ...-ны өдөр

Улаанбаатар
хот

ГААЛИЙН ТУХАЙ ХУУЛЬД НЭМЭЛТ, ӨӨРЧЛӨЛТ ОРУУЛАХ ТУХАЙ

1 дүгээр зүйл. Гаалийн тухай хуульд доор дурдсан агуулгатай дараах хэсэг нэмсүгэй:

1/97 дугаар зүйлийн 97.2 дахь хэсэг:

“97.2.Хүмүүнлэгийн болон буцалтгүй тусламж, хөнгөлөлттэй зээлийн санхүүжилттэй зам, барилга байгууламжийн ажилд ашиглах машин механизм, техник, тоног төхөөрөмжийн хувьд энэ хуулийн 97.1-д заасан хугацааг гэрээний хугацаанд багтаан 1 жил хүртэлх хугацаагаар сунгаж болно.”

2/235 дугаар зүйлийн 235.3 дахь хэсэг:

“235.3.Бараа, тээврийн хэрэгслийн гаалийн хяналтын үе шат нь гаалийн мэдээллийн системээр дамжуулан олон нийтэд нээлттэй байх ба мэдүүлэгчийг таних боломжгүй байна.”

3/249 дүгээр зүйлийн 249.5, 249.6, 249.7 дахь хэсэг:

“249.5.Гааль, татварын алба нь гааль, татварын бүртгэл, мэдээллийн нэгдсэн сангийн мэдээлэлд үндэслэн тухайн татварын жилд мэдүүлэгчийн үйл ажиллагаанд давхардуулан хяналт шалгалт хийхгүй.

249.6.Шаардлагатай тохиолдолд энэ хуулийн 249.5-д заасан хяналт шалгалтыг гааль, татварын алба хамтран хэрэгжүүлнэ.

249.7.Гаалийн байгууллага хяналт шалгалт хийх талаар мэдүүлэгчид ажлын 10-аас доошгүй өдрийн өмнө урьдчилан мэдэгдэнэ.”

4/252 дугаар зүйлийн 252.9, 252.10 дахь хэсэг:

“252.9.Магадлан шинжилгээгээр ангиллын код тодорхойлон улсын хилээр оруулсан Стандартчилал, техникийн зохицуулалт, тохирлын үнэлгээний итгэмжлэлийн тухай хуулийн 14.2-т заасан тохирлын гэрчилгээ бүхий барааны нэр, зориулалт, марк, модель, гарал үүслийн улс, үйлдвэрлэгч, илгээгч өөрчлөгдөөгүй тохиолдолд уг барааг улсын хилээр дахин оруулахад мэдүүлэгчийн гадаад худалдааны гэрээнд заасан тоо хэмжээний хүрээнд магадлан шинжилгээ хийхгүй.

252.10.Энэ хуулийн 252.9-д тарифын бус хязгаарлалттай бараа хамаарахгүй.”

5/289 дүгээр зүйлийн 289.5 дахь хэсэг:

“289.5.Гаалийн хууль тогтоомжийг хэрэгжүүлэх, иргэн, хуулийн этгээдэд зөвлөн туслах үйлчилгээ үзүүлэх зорилгоор гаалийн байгууллага нь татварын бүртгэл, мэдээллийн нэгдсэн сангаар дамжуулан мэдээлэл авах боломжтой байна.”

2 дугаар зүйл.Гаалийн тухай хуулийн 240 дүгээр зүйлийн 240.2 дахь хэсгийн “хэрэгжүүлэхдээ” гэсний дараа “гааль, татварын албаны бүртгэл, мэдээллийн нэгдсэн сангийн мэдээлэлд үндэслэн” гэж, 249 дүгээр зүйлийн 249.1 дэх хэсгийн “байгууллага” гэсний дараа “эрсдэлд үндэслэн” гэж, 269¹ дүгээр зүйлийн 269¹.1.1 дэх заалтын “тавих” гэсний дараа “, иргэн, хуулийн этгээдэд зөвлөн туслах үйлчилгээ үзүүлэх” гэж тус тус нэмсүгэй.

3 дугаар зүйл.Гаалийн тухай хуулийн 12 дугаар зүйлийг доор дурдсанаар өөрчлөн найруулсугай:

“12 дугаар зүйл.Гаалийн байгууллагын зөвлөн туслах үйлчилгээ

12.1.Гаалийн байгууллага нь энэ хуулийн 269¹.1.1-д заасан зөвлөн туслах үйлчилгээг доор дурдсан байдлаар хэрэгжүүлнэ:

12.1.1.иргэн, хуулийн этгээдийг гаалийн хууль тогтоомж хэрэгжүүлэхэд анхаарах асуудлууд, үүсдэг нийтлэг эрсдэлийн мэдээллийг агуулсан гарын авлага, заавар зөвлөмжийг боловсруулан хүргүүлэх;

12.1.2.гаалийн хууль тогтоомж, гаалийн бүрдүүлэлтийн маягтад өөрчлөлт орсон тохиолдолд төрийн мэдээлэл сэтгүүлд хэвлэгдсэн, эсхүл улсын нэгдсэн бүртгэлд бүртгэгдсэнээс хойш 14 хоногийн дотор тухайн өөрчлөлтийг хэрэгжүүлэхэд анхаарах асуудлуудын мэдээллийг агуулсан зөвлөмжийг иргэн, хуулийн этгээдэд цахим системээр дамжуулан хүргүүлэх зохион байгуулах;

12.1.3.хууль даган мөрдөлтийн түвшин буурах, эрсдэлийн үнэлгээнд сөргөөр нөлөөлсөн, нөлөөлөх нөхцөл бүрдсэн иргэн, хуулийн этгээдэд гаалийн хууль тогтоомжийг сайн дураараа даган мөрдөх, гааль, татварын хууль тогтоомжийн дагуу татвар, хураамжаа төлөх, зөрчлөө арилгах боломж олгож, эрсдэлээс урьдчилан сэргийлэх;

12.1.4.гаалийн хууль тогтоомжийг хэрэгжүүлэх, гаалийн албан татварын хөнгөлөлт эдлэх, татвараас чөлөөлөгдөх боломжийн талаар иргэн, хуулийн этгээдэд мэдээлэл, зөвлөгөө өгөх зорилгоор хиймэл оюун ухаан болон их өгөгдөлд суурилсан, 24 цагийн турш тасралтгүй ажиллах автомат хариулагчийг ажиллуулах;

12.1.5.худалдаа, аж үйлдвэрийн танхим, мэргэжлийн холбоо, салбарын асуудал эрхэлсэн төрийн захиргааны төв байгууллага, олон улсын байгууллага, гадаад улсын дипломат болон консулын байгууллагуудаас гаалийн хууль тогтоомжийг хэрэгжүүлэхтэй холбоотой тодорхой асуудлаар зөвлөгөө, сургалт авахаар ирүүлсэн хүсэлтийн дагуу сургалт, хэлэлцүүлэг зохион байгуулах;

12.1.6.олон нийтийн гадаад худалдаа, гаалийн мэдлэгийг дээшлүүлэх, эрсдэлээс урьдчилан сэргийлэх, гаалийн хуулийн тогтоомжийг сурталчлан таниулах зорилгоор төр, хувийн хэвшил болон мэргэжлийн холбоодтой хамтран сургалт, хэлэлцүүлэг тогтмол зохион байгуулж, гарын авлага, зөвлөмж, аргачлалаар хангаж ажиллах;

12.1.7.цахим хуудсандаа гаалийн хууль тогтоомжийг англи болон монгол хэлээр байршуулах, олон нийтийн мэдээллийн хэрэгслээр нийтийг хамарсан сурталчилгаа, сургалт, мэдээллийн нэвтрүүлэг зохион байгуулах, нийтлэл гаргах;

12.1.8.хуулиар зөвшөөрөгдсөн бусад шаардлагатай арга хэмжээг авч хэрэгжүүлэх.

12.2.Энэ хуулийн 12.1-д заасан гарын авлага, зөвлөмж, сургалтын материал, дүрс бичлэг, сургалтыг брайл үсэг, дохионы хэлийг ашиглах шаардлагад нийцүүлэн хөгжлийн бэрхшээлтэй иргэдийг мэдээлэл тэгш авах эрхээр хангасан байна.

12.3.Гаалийн байгууллага нь энэ хуулийн 12.1-д зүйлд заасны дагуу зохион байгуулсан сургалт, хэлэлцүүлэг, зөвлөгөө, гарын авлага, зөвлөмж, хөтөлбөр мэдээллийг гаалийн байгууллагын цахим хуудсанд олон нийтэд нээлттэй байршуулна.

12.4.Иргэн, хуулийн этгээд өөрийн эрхлэх үйл ажиллагаатай холбоотой гаалийн байгууллагаас зөвлөн туслах үйлчилгээ, сургалт авах хүсэлтийг гаалийн байгууллагад гаргаж болно.

12.5.Энэ хуулийн 12.4-т заасан хүсэлтийг хүлээн авснаас хойш 30 хоногийн дотор гаалийн байгууллага хэлэлцүүлэг, сургалтын хөтөлбөр боловсруулан, товыг зарлан зарлан 45-аас доошгүй хоногийн хугацаанд хэлэлцүүлэг, сургалтыг зохион байгуулна. Хэлэлцүүлэг, сургалтын тов, хөтөлбөрийг Монголын худалдаа, аж үйлдвэрийн танхим, тухайн иргэн, хуулийн этгээдийн үйл ажиллагааны салбарын мэргэжлийн холбоо болон олон нийтэд нээлттэй мэдээлнэ.

12.6.Энэ хуулийн 12.5-д заасан хэлэлцүүлэг, сургалтын хөтөлбөрийг тухайн салбарын мэргэжлийн холбоодтой хамтран боловсруулж болно.

12.7.Иргэн, хуулийн этгээдэд гаалийн байгууллагаас үзүүлэх зөвлөн туслах үйлчилгээ нь үнэ төлбөргүй байх бөгөөд иргэн, хуулийн этгээдийн хүсэлтээр зохион байгуулсан сургалтад хичээл заасан багшийн зөвхөн цагийн хөлсийг тухайн иргэн, хуулийн этгээд хариуцна.”

4 дүгээр зүйл.Гаалийн тухай хуулийн 294¹ дүгээр зүйлийн 294¹.1 дэх хэсгийн “татварын үнийн дүнгээс хугацаа хожимдуулсан хоног тутамд 0.3 хувийн хүү ногдуулах бөгөөд энэ заалтын "хүү" гэсэн ойлголт нь Иргэний хуулийн "анз" гэсэн ойлголтод үл хамаарна” гэснийг “татварт Татварын ерөнхий хуульд заасны дагуу алданги тооцно” гэж өөрчилсүгэй.

5 дугаар зүйл.Энэ хуулийг 2026 оны 01 дүгээр сарын 01-ний өдрөөс дагаж мөрдөнө.

МОНГОЛ УЛСЫН ХУУЛЬ

2025 оны ... дугаар
сарын ...-ны өдөр

Улаанбаатар
хот

ГААЛИЙН ТАРИФ, ГААЛИЙН ТАТВАРЫН ТУХАЙ ХУУЛЬД НЭМЭЛТ, ӨӨРЧЛӨЛТ ОРУУЛАХ ТУХАЙ

1 дүгээр зүйл. Гаалийн тариф, гаалийн татварын тухай хуулийн 8 дугаар зүйлд доор дурдсан агуулгатай 8.10 дахь хэсэг нэмсүгэй:

“8.10. Гаалийн үнийг шалгах үйл ажиллагаа нь гаалийн мэдээллийн системээр дамжуулан олон нийтэд нээлттэй байх ба мэдүүлэгчийг таних боломжгүй байна.”

2 дугаар зүйл. Гаалийн тариф, гаалийн татварын тухай хуулийн 41 дүгээр зүйлийн 41.3 дахь хэсгийн “баталгаа нь” гэсний дараа “барааны хувьд” гэж нэмсүгэй.

3 дугаар зүйл. Гаалийн тариф, гаалийн татварын тухай хуулийн 3 дугаар зүйлийн 3.1.11 дэх хэсгийн “4.1.11” гэснийг “12.2.8” гэж, 6 дугаар зүйлийн 6.1 дэх хэсгийн “Засгийн газар” гэснийг “Монголын худалдаа, аж үйлдвэрийн танхим” гэж, мөн зүйлийн 6.2 дахь хэсгийн “Монгол Улсын Засгийн газрын” гэснийг “Монголын худалдаа, аж үйлдвэрийн танхимын” гэж, мөн зүйлийн 6.3 дахь хэсгийн “гааль, татвар” гэснийг “гаалийн асуудал хариуцсан төрийн захиргааны байгууллага” гэж, 35 дугаар зүйлийн 35.3 дахь хэсгийн “тарифын” гэснийг “тариф, татварын” гэж, “валютын ханшийг” гэснийг “татварыг” гэж, 38 дугаар зүйлийн 38.6 дахь хэсгийн “22.8.1-22.8.8” гэснийг “20.1.1.а-20.1.1.в” гэж, мөн зүйлийн 38.7 дахь хэсгийн “Нэмэгдсэн өртгийн албан татварын тухай хуулийн 8.1-д” гэснийг “Татварын ерөнхий хуулийн 9.3-т” гэж, 45 дугаар зүйлийн 45.2 дахь хэсгийн “татварын төлбөрийн дүнгийн 0,3 хувиар тооцон хоног тутам хүү төлнө” гэснийг “татварт Татварын ерөнхий хуульд заасны дагуу алданги тооцно” гэж тус тус өөрчилсүгэй.

4 дүгээр зүйл. Гаалийн тариф, гаалийн татварын тухай хуулийн 6 дугаар зүйлийн 6.2 дахь хэсгийн “байх бөгөөд түүнийг Засгийн газраас томилж, чөлөөлөх ба нарийн бичгийн дарга нь орон тооных” гэснийг, 35 дугаар зүйлийн 35.3 дахь хэсгийн “төгрөгийн гадаад валюттай харьцах ханш болон” гэснийг, мөн зүйлийн 35.6 дахь хэсгийн “,” гэснийг тус тус хассугай.

5 дугаар зүйл. Гаалийн тариф, гаалийн татварын тухай хуулийн 35 дугаар зүйлийн 35.4 дэх хэсэг, 38 дугаар зүйлийн 38.1.13 дахь заалтыг тус тус хүчингүй болгосугай.

6 дугаар зүйл. Энэ хуулийг 2026 оны 01 дүгээр сарын 01-ний өдрөөс дагаж мөрдөнө.

МОНГОЛ УЛСЫН ХУУЛЬ

2025 оны ... дугаар
сарын ...-ны өдөр

Төрийн ордон,
Улаанбаатар хот

ТАТВАРЫН МЭРГЭШСЭН ЗӨВЛӨХ ҮЙЛЧИЛГЭЭНИЙ ТУХАЙ ХУУЛЬД НЭМЭЛТ, ӨӨРЧЛӨЛТ ОРУУЛАХ ТУХАЙ

1 дүгээр зүйл.Татварын мэргэшсэн зөвлөх үйлчилгээний тухай хуульд доор дурдсан агуулгатай хэсэг, заалт нэмсүгэй:

1/11 дүгээр зүйлийн 11.1.6 дахь заалт:

“11.1.6.татварын хууль тогтоомж, түүний өөрчлөлт, татвар төлөгчийн татварын эрсдэлээс хамгаалах, урьдчилан сэргийлэх талаар татвар төлөгчид сурталчлан таниулах, мэдээлэл өгөх.”

2/16 дугаар зүйлийн 16.1.7 дахь заалт:

“16.1.7.Татварын ерөнхий хуулийн 77¹.6-д заасан зөвлөн туслах үйл ажиллагааг татварын албатай хамтран зохион байгуулж, сургалт орох, хичээл заах.”

3/18 дугаар зүйлийн 18.2.7, 18.2.8 дахь заалт:

“18.2.7.татвар төлөгчийг мэдээ мэдээллээр хангах, сургалт зохион байгуулах ажлыг татварын албатай хамтран зохион байгуулах;

18.2.8.татварын хууль тогтоомжийн тайлбарыг боловсруулж, олон нийтэд түгээх ажлыг зохион байгуулах.”

2 дугаар зүйл.Татварын мэргэшсэн зөвлөх үйлчилгээний тухай хуулийн 3 дугаар зүйлийн 3.1.4 дэх заалтын “, татварын итгэмжлэгдсэн хуулийн этгээдэд ажиллах татварын итгэмжлэгдсэн нягтлан бодогчийг” гэснийг “хувь хүнийг” гэж, 10 дугаар зүйлийн 10.1.1 дэх заалтын “үүсгэн байгуулагч” гэснийг “эцсийн өмчлөгч” гэж, мөн зүйлийн 10.1.2 дахь заалтын “гурав” гэснийг “хоёр” гэж, 10.1.8 дахь заалтын “хоёр, түүнээс” гэснийг “нэгээс” гэж, “итгэмжлэгдсэн нягтлан бодогч” гэснийг “мэргэшсэн зөвлөх” гэж, 15 дугаар зүйлийн 15.1.1 дэх заалтын “татварын итгэмжлэгдсэн нягтлан бодогч нь” гэснийг “татвар, эдийн засаг, санхүү, ” гэж, 15.1.2 дахь заалтын “нягтлан бодогч” гэснийг “энэ хуулийн 15.1.1-д заасан” гэж тус тус өөрчилсүгэй.

3 дугаар зүйл.Татварын мэргэшсэн зөвлөх үйлчилгээний тухай хуулийн 3 дугаар зүйлийн 3.1.5 дахь заалт, 15 дугаар зүйлийн 15.1.4 дэх заалтуудыг тус тус хүчингүй болсонд тооцсугай.

4 дүгээр зүйл.Энэ хуулийг 2026 оны 01 дүгээр сарын 01-ний өдрөөс эхлэн дагаж мөрдөнө.

Гарын үсэг